

# K'chopakhui Website htungmang naak ung hmat vai hlü ci ah monglam gui

FREE EMAIL SERVICE FOR K'CHO PEOPLE AROUND THE WORLD



## K'cho Pakhui nak ci ah K'cho k'chang van mei awm law vä

Shin ung nami om law tu ci ah k'cho k'chang van m'lung ah yei kiai diim kiäp naak, pumhla kiädung ah gai hteeh phyet lah naak awn nami om khai ah yum naak om hleih nangmi gui awn a täng ah yei kiai naak m'lung om tu ci nei. K'cho cu ting ling pii ci ah Pakhui tumat ah a kia cu van naw mi hmat ci. Pupa phäi naa gui ah bä maang naak gui phi mi va khe ba vai ak daa om ci. A tuh k'chü phi hnuh-hmat k'chang gui ak daa om ci gui. Cun te mi bä mi maang, mi hnuh mi hmat naak gui awn mi k'cho ng'ming kä mi htang hlak hning cu thüi vai ah phi kiak ci. Cun ah kia hleih ät naak vai lam shui law ci gui ah hnuh hmat k'chang gui, ang ng'vai tu ba gui lah mi pupa mi phäi naa gui ah ami na m'shüm naak ah lam ung kawng ät ne van ng'gui ne mi theh law naak hning vai ah kho hnüp cu gawk law ling khai ci ah yum naak om ci. A cun a gawk law naak yät vai cu nang lah kei ah ni m'lung ng'ngaih ni bü naak tu cu ak tung pii ah hlü ci ah kiak ci. Shin cu k'chopakhui lah k'cho k'chang van ah khan ah hnuh naak ah lam tumat ah kiak ci.

## K'chopakhui website ah mong

Shin ah k'chopakhui website m'düih vai a cu u naw phi kä ling ci. U naw phi kä pien ci. K'chopakhui group pyan naak phi kum ät khe law hleih a cun ah k'chopakhui ah ng'ming awn website pyang ne email phi a cun ah k'chopakhui ng'ming awn van naw thung vai ah bü naak a om cu sho law pyi ci. I hnuh hmat naak kä a om ung phi mät ah m'chüt naak tu phäh phäh ung ka noh k'chopakhui ah bä naak vai ung cu bi lawh tu vai ah bü naak om hleih shin cu leng law ah kia ci. Maa lam ah bi lawh vai ah bü naak gui cu ak daa om ci. A cun ah bi lawh naak ung phi k'cho k'chang van noh hnuh hmat naak awn phi kiai, ng'ngaih nii mong lam awn phi kiai van naw a na ng'lung ng'lak law püi vai cu ka yum ci. Guk hten bi lawh pyan tham naak a van ung a hmaa a kat naak a om ung phi m'lung ng'ngaih nii awn nami na m'thei m'thang tu vai ng'yak hlü nei.

## Free Email Service

K'cho pakhui na ci ah k'cho k'chang van naw shin ah k'chopakhui ah ng'ming awn email pyang tu ne gah ci. Shin ah email account pyan naak vai ah form ung van noh ak nii ah be ne ng'kium khai ah hlü ci gui phung ak k'be tu vai ng'yaak hlü nei. Cun ah hlü ci ah monglam gui k'be naak ung a van ak nii ah kä k'be tu ci cu pyang ne kä gah khai. Cun kawn ah Email luh naak vai cu mät ah website ung i hawk khia ah pyan vai kä hnuh hmat tu pha ah kia hleih a shin ah website hleih naak mät ung ka ng'vat tu ba ne mi htung cang khai. Email pyang tu ci gui van ah email cu a shin ah k'chopakhui ah ng'ming awn email gah khai. avai hlü : [ng'ming@chopakhui.com](mailto:ng'ming@chopakhui.com) ci ne email htung ne gah khai. Email cu unlimited ah hleih ah kia hleih k'cho k'chang na ci phung a u noh phi email cu free ah pyang tu ne gah khai nei.

## Free Blog

A shin ah chopakhui ng'ming awn email pyang tu pyi ci a u naw phi a mät ah yum ah ng'ming awn blog pyang ne gah khai. Cun te blog a pyan naak ung a htung hlü ah tatpung (header) a phäh cu a mät ah yum ah design pyang maa ne tah chopakhui website admin am a poh ung admin naw pungsan pyang ne active bi ne tah email poh law ba khai. A cun ah email ung om ci ah link awn hteit ne email lah password awn lut ne a guk hlü, a pyan hlü gui cu bi ne gah khai. Email awn gawk law ba khai ah blog link pungsan cu [www.blog-ng'ming.chopakhui.com](http://www.blog-ng'ming.chopakhui.com) ci ah kiak khai. Blog pungsan nami teng naak tu vai ah **ka mät ah blog** ung hteit ne teng tu shüm vä.

## Free Website

A shin ah k'chopakhui website ah ng'ming ah hnuu ah ka noh yum ah ng'ming awn website gui phi unlimited ah pyang ba ne gah ci ah kia hleih k'cho k'chang van a phäh ah hlü ci ah aphoih gui, community gui, association gui a i naw phi a ng'ming phäh phäh awn website pyang ne gah khai. Cun te design gui a van cu pyang tu hlük ci naw ang ng'ngaih ah pyang yawp ne tah a pyan naak tu hlü ah ng'ming awn a poh law ung A shin ah k'chopakhui website ung thun tu pe ne gah khai. Cun te shin ung website pyang tu ci a u naw phi a mät naw edit bi ne kä gah khai. I ah kia hleih ci ung shin ah website ung admin account tumat bäng va om ci ah kia hleih admin bäng naw vah edited bi ne gah khai. Pyang tu khai naw ang ng'yaak hlü ah design a yum ah pungsan gui cu admin am a poh ung admin naw edit bi ba ne gah khai. I hawk khia a kia vai nami hmat tu hlü däm ung K'cho Ethnic website hteit ne nami teng tu vai. A cen ah k'cho Ethnic Website cu a shin ah k'chopakhui website ung pyan ah website ah kiak ci.

## Bü Naak

Shin ah K'chopakhui website ah ak tung pii ah bü naak cu,

1. K'cho email cu K'cho k'chang van naw free awn htung mang ne a gah vai.
2. K'cho domain awn hlü law ci ah k'cho website gui tumat ah pyang ät ne gah vai.
3. K'cho k'chang van hnuh hmat naak lam shui ne kawng ät yawp vai.

Shin ung guk then ah monglam gui läk tu ne chopakhui ah bä naak vai lam na m'shüm tu ci ah K'chohta k'chang van nami bä ni.

K'cho Pakhui Website

[www.chopakhui.com](http://www.chopakhui.com)